

I. DISPOSICIÓN XERAIS

XEFATURA DO ESTADO

15714 *Lei 11/2017, do 28 de decembro, pola que se aproba a metodoloxía de sinalamento da cota do País Vasco para o quinquenio 2017-2021.*

FELIPE VI

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei:

PREÁMBULO

A Constitución española, na súa disposición adicional primeira, declara o amparo e respecto dos dereitos históricos dos territorios forais e ordena que a actualización do dito réxime foral se levará a cabo, se é o caso, no marco da propia Constitución e dos estatutos de autonomía.

O Estatuto de autonomía do País Vasco, aprobado pola Lei orgánica 3/1979, do 18 de decembro, establece, no seu artigo 41, número 1, que as relacións de orde tributaria entre o Estado e a Comunidade Autónoma do País Vasco se regularán polo sistema tradicional de concerto económico, e o número 2.d) do dito artigo dispón que o País Vasco contribuirá ao sostemento das cargas xerais do Estado mediante a achega dunha cota global integrada polos correspondentes a cada un dos seus territorios históricos.

Finalmente, o número 2.e) do citado artigo 41 prevé que unha comisión mixta procederá ao sinalamento das cotas correspondentes a cada territorio histórico e que a cota global resultante se aprobará por lei coa periodicidade que se fixe no concerto económico.

O concerto económico entre o Estado e o País Vasco, aprobado pola Lei 12/2002, do 23 de maio, establece no seu artigo 50, número un, que cada cinco anos, mediante lei das Cortes Xerais e logo de acordo da Comisión Mixta do Concerto Económico, se aprobará a metodoloxía de sinalamento da cota que rexerá no quinquenio, conforme os principios xerais establecidos no concerto económico, así como a cota do primeiro ano do quinquenio.

En cumprimento destes preceptos, ambas as administracións, de común acordo, procederon a determinar a metodoloxía de sinalamento da cota que se debe aplicar durante o quinquenio 2017-2021 e a fixar a cota líquida provisional do ano 2017, ano base do quinquenio, tendo adoptado a Comisión Mixta do Concerto Económico os correspondentes acordos na súa reunión do 19 de xullo de 2017.

Artigo único. Aprobación da metodoloxía de sinalamento da cota do País Vasco para o quinquenio 2017-2021

Apróbase a metodoloxía de sinalamento da cota do País Vasco para o quinquenio 2017-2021, a que se refiren o artigo 50 do concerto económico entre o Estado e o País Vasco e o artigo 41.2.e) do Estatuto de autonomía do País Vasco, que figura como anexo á presente lei.

Disposición derradeira única. *Entrada en vigor.*

A presente lei entrará en vigor o día seguinte ao da súa publicación no «Boletín Oficial del Estado» e producirá efectos desde o 1 de xaneiro de 2017.

Por tanto,

Mando a todos os españois, particulares e autoridades, que cumpran e fagan cumprir esta lei.

Madrid, 28 de decembro de 2017.

FELIPE R.

O presidente do Goberno,
MARIANO RAJOY BREY

ANEXO

CAPÍTULO I

Réxime xurídico e vixencia da metodoloxía

Artigo 1. *Réxime xurídico e vixencia da metodoloxía.*

As cotas do País Vasco correspondentes aos exercicios 2017-2021, ambos incluídos, determinaranse pola metodoloxía regulada nos artigos seguintes, normativa que aplica a establecida na sección 2.^a do capítulo II do concerto económico coa Comunidade Autónoma do País Vasco, aprobado pola Lei 12/2002.

Artigo 2. *Sistemática.*

Para efectos do disposto no artigo anterior determinarase a cota líquida do ano base do quinquenio, que será actualizada para os exercicios seguintes.

CAPÍTULO II

Determinación da cota líquida do ano base

Artigo 3. *Determinación da cota do ano base.*

A cota líquida do ano base do quinquenio 2017-2021 determinarase pola aplicación do índice de imputación ao importe total das cargas non asumidas pola Comunidade Autónoma e mediante a práctica dos correspondentes axustes e compensacións, todo isto nos termos previstos nos artigos seguintes.

Artigo 4. *Cargas do Estado non asumidas pola Comunidade Autónoma.*

Un. Considéranse cargas do Estado non asumidas pola Comunidade Autónoma as que correspondan a competencias cuxo exercicio non fose asumido efectivamente por aquela.

Dous. Para a determinación do importe total das ditas cargas deducirase do total de gastos do orzamento do Estado a asignación orzamentaria íntegra que, a nivel estatal, corresponda ás competencias asumidas pola Comunidade Autónoma desde a data de efectividade da transferencia fixada nos correspondentes reais decretos.

Tres. Entre outras, terán o carácter de cargas non asumidas pola Comunidade Autónoma as seguintes:

- a) As cantidades asignadas nos orzamentos xerais do Estado aos fondos de compensación interterritorial.
- b) As transferencias ou subvencións que faga o Estado a favor de entes públicos na medida en que as competencias desempeñadas por estes non estean asumidas pola Comunidade Autónoma do País Vasco.
- c) Os xuros e cotas de amortización das débedas do Estado.

Catro. A imputación aos territorios históricos da parte correspondente por cargas non asumidas efectuarase por aplicación do índice de imputación a que se refire o artigo 7 seguinte.

Artigo 5. *Axustes.*

Un. Sen prexuízo do disposto nos artigos 14 e 15 seguintes, as cifras que resulten da imputación a que se refire o número catro do artigo anterior axustaranse para perfeccionar a estimación dos ingresos por impostos directos imputables ao País Vasco e ao resto do Estado segundo o establecido no artigo 55 do concerto.

Dous. As cantidades que resulten da práctica do axuste regulado no número un anterior constituirán a cota de cada territorio histórico.

Artigo 6. *Compensacións.*

Un. Da cota correspondente a cada territorio histórico restaranse por compensación os seguintes conceptos:

- a) A parte imputable dos tributos non concertados.
- b) A parte imputable dos ingresos orzamentarios de natureza non tributaria.
- c) A parte imputable do déficit que presenten os orzamentos xerais do Estado.

Dous. A imputación dos conceptos sinalados no número anterior efectuarase aplicando o índice establecido no artigo 7 seguinte.

Artigo 7. *Índice de imputación.*

O índice de imputación a que se refiren os artigos 4 e 6 precedentes, determinado basicamente en función da renda dos territorios históricos en relación co Estado, é o 6,24 por 100 para o quinquenio en curso.

Artigo 8. *Cota líquida.*

Un. A cantidade que resulte tras a práctica dos axustes regulados no artigo 5 e as compensacións reguladas no artigo 6.un anteriores constitúe a cota líquida do País Vasco correspondente ao exercicio 2017, ano base do quinquenio.

A dita cota líquida, unha vez determinada, minorarase na cantidade resultante de aplicar a disposición transitoria cuarta do concerto económico.

CAPÍTULO III

Determinación da cota líquida dos anos seguintes do quinquenio e liquidación definitiva das cotas

Artigo 9. *Método de determinación.*

A cota líquida correspondente aos anos do quinquenio posteriores ao ano base determinarase provisionalmente por aplicación dun índice de actualización ao dito concepto.

Artigo 10. *Índice de actualización.*

O índice de actualización é o cociente entre a previsión de ingresos por tributos concertados, excluídos os tributos cedidos na súa totalidade ás comunidades autónomas, que figure nos capítulos I e II do orzamento de ingresos do Estado do exercicio a que se refira a cota líquida, e os ingresos, debidamente homoxeneizados, previstos polo Estado polos mesmos conceptos tributarios no ano base do quinquenio.

Artigo 11. *Efectos por variación nas competencias asumidas.*

Un. Se, durante calquera dos anos do quinquenio, a Comunidade Autónoma do País Vasco asumise novas competencias cuxo custo anual a nivel estatal fose incluído dentro das cargas do Estado que se computaron para a determinación da cota do ano base do quinquenio recollido no artigo 8, procederá a calcular o custo total anual a nivel estatal asociado ao traspaso no exercicio en que este se produza, segundo se deduza dos orzamentos xerais do Estado para o referido exercicio.

No suposto de que a efectividade do novo traspaso non coincida co 1 de xaneiro do exercicio, procederá a ratear o custo total anual a nivel estatal asociado ao traspaso no dito exercicio proporcionalmente á parte do ano en que o País Vasco asumise tales competencias, con efectos exclusivos para a determinación da cota do exercicio en que se produza o traspaso.

A citada redución proporcional terá en conta a periodicidade real dos gastos correntes, así como o efectivo grao de realización dos investimentos do Estado.

Dous. No caso de producirse a circunstancia sinalada no punto anterior, minorarase a cota líquida do ano base do quinquenio no importe que resulte de aplicar ao custo total anual a nivel estatal no exercicio en que se produza o traspaso, dividido polo índice de actualización regulado no artigo 10, o índice de imputación regulado no artigo 7.

A cota líquida do ano base do quinquenio, así revisado, será o que se utilice para a determinación da cota do exercicio en que se produce o traspaso e dos exercicios posteriores.

Tres. O mecanismo descrito aplicarase de maneira inversa no caso de que a Comunidade Autónoma do País Vasco deixe de exercer competencias que tiver asumidas.

Catro. Se, durante calquera dos anos do quinquenio, o Estado reserva para si ou asumise novos compromisos de financiamento derivados de medidas legislativas, de interese xeral ou de acordos interinstitucionais, sobre materias cuxa execución corresponda ás comunidades autónomas, reunirá a Comisión Mixta do Concerto Económico para analizar e determinar a participación financeira que, se é o caso, corresponda ao País Vasco.

Artigo 12. *Liquidación definitiva.*

Un. As cotas fixadas provisionalmente conforme o disposto nos artigos anteriores liquidaranse definitivamente aplicando o valor real do índice de actualización definido no artigo 10, que se deduza da recadación líquida realmente obtida polo Estado, tanto no exercicio a que se refire a cota como a súa homoxénea no ano base do quinquenio, á cota líquida definitiva homoxénea do ano base.

Dous. Excepcionalmente, a liquidación definitiva da cota líquida correspondente ao ano base do quinquenio efectuarase considerando o valor real do índice de actualización, definido no artigo 10, que se deduza da recadación líquida realmente obtida polo Estado no ano base do quinquenio respecto á previsión homoxénea de recadación para ese mesmo exercicio que figure no orzamento de ingresos do Estado.

Tres. A recadación líquida obtida polo Estado en cada exercicio será a que se deduza da certificación expedida pola Intervención Xeral da Administración do Estado para estes efectos; computarase como tal a obtida no ano a que se refire a certificación calquera que sexa o da devindicación.

Catro. A liquidación definitiva efectuarase no mes de maio do exercicio seguinte a aquel a que se refiren a cota e a compensación obxecto desta e as diferenzas que orixine coa cota líquida fixada provisionalmente para o citado exercicio regularizaranse no citado mes de maio; computarase, se é o caso, co ingreso que hai que efectuar previsto no artigo seguinte, no citado mes.

CAPÍTULO IV

Normas comúns

Artigo 13. *Ingreso da cota.*

A cantidade a ingresar pola Comunidade Autónoma do País Vasco en cada exercicio aboaráselle á Facenda pública do Estado en tres prazos iguais, durante os meses de maio, setembro e decembro do exercicio.

Artigo 14. *Axuste polo imposto sobre o valor engadido.*

Un. Á recadación real do País Vasco polo imposto sobre o valor engadido engadiránselle:

- a) O 6,875 por 100 da recadación polo imposto sobre o valor engadido obtida nas alfándegas.
- b) O 1,110 por 100 da recadación real do territorio común dividida polo 94,235 por 100, ou da recadación real do País Vasco dividida polo 5,765 por 100, segundo que a porcentaxe de recadación do País Vasco con respecto á total estatal, excluída a obtida nas alfándegas, sexa superior ou inferior, respectivamente, ao 5,765 por 100.

Dous. A imputación provisional do axuste anterior e a súa regularización como definitivo no exercicio inmediato seguinte efectuaranse conforme o procedemento vixente en cada momento aprobado pola Comisión Mixta do Concerto Económico.

Artigo 15. *Axuste polos impostos especiais de fabricación.*

Un. Á recadación real do País Vasco polos impostos especiais de fabricación, sobre alcohol e bebidas derivadas, produtos intermedios, cervexa, hidrocarburos e elaborados do tabaco engadiránselle:

- a) 1. O 7,130 por 100 da recadación polos impostos sobre alcohol e bebidas derivadas e sobre produtos intermedios obtida nas alfándegas.

2. O 5,198 por 100 da recadación real polos impostos sobre alcohol e bebidas derivadas e sobre produtos intermedios do territorio común dividida polo 98,068 por 100, ou da recadación real do País Vasco polos mesmos conceptos tributarios dividida polo 1,932 por 100, segundo que a porcentaxe de recadación do País Vasco con respecto á total estatal, excluída a obtida nas alfándegas, sexa superior ou inferior, respectivamente, ao 1,932 por 100.

- b) 1. O 7,130 por 100 da recadación polo imposto sobre a cervexa obtida nas alfándegas.

2. O 5,399 por 100 da recadación real polo imposto sobre a cervexa do territorio común dividida polo 98,269 por 100, ou da recadación real do País Vasco polo mesmo concepto tributario dividida polo 1,731 por 100, segundo que a porcentaxe de recadación do País Vasco con respecto á total estatal, excluída a obtida nas alfándegas, sexa superior ou inferior, respectivamente, ao 1,731 por 100.

- c) 1. O 6,560 por 100 da recadación polo imposto sobre hidrocarburos obtida nas alfándegas.

2. Con signo negativo, o 1,700 por 100 da recadación real polo imposto sobre hidrocarburos do territorio común, excluída a derivada da aplicación dos tipos impositivos autonómicos, dividida polo 91,740 por 100, ou da recadación real do País Vasco polo mesmo concepto tributario dividida polo 8,260 por 100, segundo que a porcentaxe de

recadación do País Vasco con respecto á total estatal, excluída a obtida nas alfándegas, sexa superior ou inferior, respectivamente, ao 8,260 por 100.

3. A diferenza entre a recadación real anual obtida en territorio común por aplicación dos tipos impositivos autonómicos aprobados polas institucións competentes do País Vasco e a obtida no País Vasco por aplicación dos tipos impositivos autonómicos aprobados por outras comunidades autónomas.

d) A diferenza entre o resultado de aplicar á recadación real no territorio común polo imposto sobre os elaborados do tabaco a porcentaxe que corresponda anualmente ao valor dos elaborados subministrados a expendedorías de tabaco e timbre situadas no País Vasco, sobre o valor dos elaborados subministrados aos ditos establecementos no territorio de aplicación deste imposto, e o resultado de aplicar o complementario a cen da porcentaxe anteriormente definida á recadación real polo mesmo concepto tributario no País Vasco.

Dous. No caso de que a recadación real obtida polo País Vasco, excluída a derivada do tramo autonómico, difira, polo imposto sobre hidrocarburos, en máis do 7 por 100, e polos impostos sobre alcohol e bebidas derivadas, produtos intermedios e cervexa, en máis do 10 por 100, da cifra que resulte de aplicar os índices contidos no último inciso das letras a) 2, b) 2 e c) 2 do número un deste artigo á recadación real do conxunto do Estado por cada un destes, corrixiñanse os ditos índices para efectuar os axustes do ano en que se produzan as diferenzas citadas.

Esta corrección realizarase por aplicación da porcentaxe de variación, positiva ou negativa, que exceda sobre os respectivos límites establecidos no parágrafo anterior aos correspondentes índices contidos no último inciso das letras a) 2, b) 2 e c) 2 do número un anterior.

Tres. A imputación provisional do axuste anterior, para cada un dos impostos, e a súa regularización como definitivo, no exercicio inmediato seguinte, efectuarase conforme o procedemento vixente en cada momento aprobado pola Comisión Mixta do Concerto Económico.

Disposición adicional primeira.

Para o quinquenio 2017-2021 mantense vixente o establecido na disposición adicional primeira da Lei 37/1997, do 4 de agosto.

Disposición adicional segunda.

Apróbase a cota líquida do País Vasco para o ano base do quinquenio 2017-2021 que figura no anexo I desta metodoloxía.

Disposición adicional terceira.

O financiamento que corresponda ao País Vasco pola súa participación no custo asociado aos programas e actuacións públicas no ámbito do traballo, o emprego e a formación profesional de acordo co establecido no Real decreto 1441/2010, do 5 de novembro, deducirase por compensación da cota líquida a pagar en cada exercicio.

Disposición adicional cuarta.

No caso de que se produza unha reforma no ordenamento xurídico tributario do Estado que afecte a concertación dos tributos, se produza unha alteración na distribución das competencias normativas que afecte o ámbito da imposición indirecta ou se creen novas figuras tributarias ou pagamentos á conta, ambas as administracións procederán, de común acordo, á pertinente revisión da cota líquida do ano base do quinquenio e do índice de actualización desta, na forma e contía que resulte procedente. Todo isto producirá efectos a partir do ano en que se produza a dita reforma.

Ambas as administracións acordarán, se é o caso, o establecemento dos axustes ou compensacións que, dada a natureza da figura tributaria concertada, sexan procedentes.

Disposición adicional quinta.

No caso de que se produza unha reforma do réxime de cesión de tributos do Estado ou unha modificación substancial nos orzamentos xerais do Estado como consecuencia da reforma do sistema de financiamento das comunidades autónomas ou dos entes locais, reunirase a Comisión Mixta do Concerto Económico para analizar e determinar, se procede, a revisión da cota líquida do ano base do quinquenio e/ou do índice de actualización desta; se é o caso, a revisión producirá efectos a partir do ano en que se produza a dita reforma.

Disposición adicional sexta.

No suposto de que se modifique o actual réxime de fabricación e comercio de elaborados do tabaco, ambas as administracións procederán, de común acordo, á revisión da letra d) do artigo 15.un.

Disposición adicional sétima.

Excepcionalmente, declárase definitiva a metodoloxía seguida para o sinalamento das cotas definitivas correspondentes ao quinquenio 2012-2016, contida na Lei 29/2007, do 25 de outubro, pola que se aproba a metodoloxía de sinalamento da cota do País Vasco para o quinquenio 2007-2011, nos termos aprobados pola Comisión Mixta do Concerto Económico.

Disposición adicional oitava.

Exclusivamente para os exercicios 2017-2021, aplicarase por compensación na cota líquida a pagar polo País Vasco en cada exercicio o resultado da liquidación do quinquenio 2007-2011, do quinquenio 2012-2016 e dos restantes acordos adoptados na Comisión Mixta do Concerto Económico do 17 de maio de 2017, nos termos acordados nesta.

Disposición derradeira primeira.

Excepcionalmente, se transcorrido o prazo de vixencia da presente lei non se promulgase unha nova lei reguladora da metodoloxía de sinalamento da cota para os exercicios seguintes, a metodoloxía recollida na presente lei será de aplicación en todos os seus termos para o sinalamento provisional das cotas líquidas e das compensacións a que se refiren a disposición adicional primeira da presente metodoloxía e a disposición transitoria cuarta do concerto económico no exercicio 2022 e seguintes.

As cotas e compensacións así determinadas substituiranse polas que resulten procedentes de aplicar a lei que as regule citada no parágrafo anterior, unha vez que esta sexa aprobada.

Disposición derradeira segunda.

O disposto na presente metodoloxía enténdese sen prexuízo da normativa contida nas disposicións adicionais, transitorias e derradeiras do concerto económico co País Vasco, que permanecen vixentes na medida en que sexan de aplicación nos seus propios termos.

ANEXO I

Cota da Comunidade Autónoma do País Vasco para 2017

(Orzamentos xerais do Estado para 2017)

	Miles de euros
ORZAMENTO DO ESTADO. GASTOS.....	276.152.254,24
CARGAS ASUMIDAS POLA C.A.P.V.....	89.966.505,13
TOTAL CARGAS NON ASUMIDAS.....	186.185.749,11
IMPUTACIÓN DO ÍNDICE (6,24%).....	11.617.990,74
COMPENSACIÓNS E AXUSTES.....	-10.313.455,24
– Por tributos non concertados.....	-539.702,10
– Por ingresos non tributarios.....	-595.209,88
– Por déficit orzamentario.....	-8.781.465,54
– Por impostos. Directos concertados.....	-397.077,72
COTA LÍQUIDA.....	1.304.535,50
Compensacións Álava/Araba.....	-4.426,53
LÍQUIDO A PAGAR.....	1.300.108,97

(*) Neste importe non está integrada como carga asumida a valoración provisional do custo asociado aos programas e actuacións públicas no ámbito do traballo, o emprego e a formación profesional traspasados ao País Vasco polo Real decreto 1441/2010, do 5 de novembro (punto G.2).